

Umhverfis- og auðlindaráðuneytið  
Skuggasundi 1  
101 Reykjavík.

Neskaupstað, 20. mars 2017

### **Efni: Umsögn um drög að frumvarpi til laga um landgræðslu**

Ráðuneytið hefur á vef sínum óskað eftir umsögnum að drögum um frumvarp til laga um landgræðslu.

Samtök náttúrustofa (SNS) fagna endurnýjun laga um landgræðslu og þeirri áherslu sem líffræðileg fjölbreytni og verndun vistkerfa fær í frumvarpinu.

SNS bendir á að mikilvægt er að tilgreint verði í frumvarpinu að ekki verði notaðar ágengar tegundir við landgræðslu á Íslandi. Er það í samræmi við það markmið laganna að stefnt skuli að því að nýting lands verndi líffræðilega fjölbreytni og einnig í samræmi við skuldbindingar Íslands með aðild að alþjóðasamningum um náttúruvernd.

Skýrar má kveða á um takmörkun nýtingar á landsvæðum sem skilgreind eru sem auðnir og rofsvæði og/eða þar sem vistkerfi eru í mjög slæmu ástandi og ætti það að vera eitt af markmiðum um vernd og sjálfbæra nýtingu lands (2.gr.). Slíkar takmarkanir gætu m.a. verið tilgreindar í landgræðsluáætlunum (7.gr). Hugsanlega mætti beita „skyndilokunum“ eins og þegar er gert við fiskveiðistjórnun og er nú nýlega farið að gera á ferðamannastöðum í samræmi við ný ákvæði í lögum um náttúruvernd (t.d. hægt að koma því fyrir í 13.gr.).

Í 7.gr segir að „ráðherra skipi fimm manna verkefnisstjórn“. Mikilvægt er að gerðar séu kröfur um fagþekkingu innan slíkrar verkefnisstjórnar og því væri skynsamlegt að hlutaðeigandi fagstofnanir tilnefndu fulltrúa í verkefnisstjórn.

Sjálfbær landnýting (10 gr.) er erfitt hugtak sem hægt er að teygja og toga. Mikilvægt er að skilgreint verði nánar hvað telst til ósjálfbærrar landnýtingar út frá sjónarhóli laganna. T.d. með því að bæta við setningu þar sem skýrt er kveðið á um að beitarnýting og önnur nýting á vistkerfum í mjög slæmu ástandi teljist ósjálfbær nýting.

Í 21. grein er fjallað um að landgræðslusvæði verði vettvangur rannsókna. Við teljum að auka mætti stuðning við rannsóknir á sviði landgræðslumála og það ætti jafnvel að vera eitt af markmiðum laganna.

Virðingarfyllst, f.h. Samtaka náttúrustofa



Kristín Ágústsdóttir, formaður SNS